



Iddimangiiu Bianco, Inuit Ataqtigiit
Inatsisartunut ilaasortaq
/MAANI

Tunumi qilalukkat pillugit § 37 naapertorlugu apeqquteqaammut akissut

Inatsisartut suleriaasianni § 37, imm. 1 naapertorlugu Tunumi qilalukkat qaqtortat qernertallu pillugit apeqqutinik marlunnik Naalakkersuisunut apeqquteqarsimavutit. Apeqquteqaat oqartussaaffigisanniit akineqartussanngorlugu ingerlateqqinneqarpoq.

Apeqqut:

1. Naalakkersuisut Tunumi qilalukkanik kisitsinissaq pilersaarutigaa?
2. Imaluunniit Naalakkersuisut qilalugartassanik amerlilissamaarpat?

Apeqqut 1-imut akissuteqaat:

Tunumi qilalukkanik qaqtortanik ima amerlatigisunik peqanngilaq allaat piniarneqarsinnaasunik. Qilalukkat qaqtortat Tunumi takuneqartartut tassaasinnaapput Svalbardip eqqaani uumasoaqtigiinneersut avissaaqqunnikut.

Qilalukkanik qaqtortanik qernertanillu illersuineq piniarnerlu pillugit Namminersorlutik Oqartussat nalunaarutaat nr. 7, 29. marts 2011-meersoq, § 2, imm. 1 naapertorlugu qilalukkat qaqtortat qernertallu Kalaallit Nunaanni tamarmi eqqissisimatitaapput, § 4-5-imi taaneqartut kisiisa pinnagit.

§ 4-mi aalajangersarneqarpoq Kalaallit Nunaata kitaani qaqtortanik qilalugaqtigiinnit immikkut pisassiissutinik Qaanaap aqutsiveqarfianut nunaqarfik Savissivik ilanngullugu kiisalu Kitaata sinnera Qimusseriarsuaq ilanngullugu Naalakkersuisut aalajangersaassasut. Tassa Tunumi qilalukkanik qaqtortanik avissaaqqunnikunut pisassiinissamut inatsisitigut tunngavissaqanngilaq.

Qilalukkanut qaqtortanut uumassusilerisunit siunnersuisoqarsimanngilaq. Pineqartut pillugit Pinngortitaleriffik nalileeqqullugu saaffigineqarsimavoq taakkualu akissutaat taamaallaat qilalukkanut qernertanut tunngassuteqarput.

Scoresby Sundimi qaammataasanut nassitsissutit atorlugit qilalukkanik qernertanik misissuinermi paasineqarpoq qilalukkat qernertat taakkua sumiiffimmi tassaniiginartartuusut kujammullu Tasiilamut nikittanngitsut. Taamatullu aamma qilalukkat qernertat Tasiilap eqqaaniittartut Scoresby Sundip tungaanut avannarpartertarnerinik malunnartoqanngilaq.

Uumasoaqtigiit Scoresby Sundimiittartut Tasiilap eqqaaniittartunit amerlanerupput, taamaattumillu piujuartitsinissamik tunngaveqarluni siunnersuinermi Ittoqqortoormiunut pisassiissutigineqarsinnaasutut innersuussutit Tasiilamut innersuussutiniit amerlanerupput.

25-02-2015
Sags nr. 2015-111521
Dok. nr. 1868377

Postboks 269
3900 Nuuk
Tlf. (+299) 34 50 00
Fax (+299) 34 63 55
E-mail: apnn@nanoq.gl
www.naalakkersuisut.gl

Misissuinerit kingulliit

Tunumi qilalukkat qernertat Danmarkimi Miljøstyrelsep aningaasanik tapiineratigut 2008-mi kisinneqarput, Pinngortitaleriffillu avataaniit amerlasuunik aningaasaliisoqarneratigut sumiiffimmilu piniartut ikiunnerisigut Scoresby Sundimi qilalukkanut tunngatillugu uumassusilerinikkut assigiinngitsunik ukiut tamaasa misissuisarpoq, misissuinerillu tamakku aamma 2015-imi ingerlateqqinneqassapput.

Qilalukkanik qernertanik kisitsinissaq

Pinngortitaleriffik Tunumi qilalukkanik qernertanik 2015-imi kisitsinissamik pilersaaruteqanngilaq. Tamanna pissuteqarpoq kisitsinissaq akisummat, Pinngortitaleriffiup 2015-imi taamaaliornissaminut akissaqartinnisaa.

Pinngortitaleriffik ilisimatitsivoq Tunumi qilalukkanik qernertanik kisitsinissaq ukiut tallimat tulluuttut ingerlanerini kisitsisoqaqqittariaqalerumaartoq. Ilisimatitsissutigineqassaaq qilalukkat qernertat pillugit nutaamik siunnersuinnissap sumiiffimmi nutaamik kisitsisoqareennissaa utaqqimaarneqarmat. Qilalukkat qernertat pillugit ilisimatuusutsikkut siunnersuinerit NAMMCO-mi JCNB-milu suleqatigiissitamit ataatsimut suliarineqartarput. Tullianik marsimi 2015-imi ataatsimiittoqassaaq, Tunumulli tunngatillugu siunnersuinerit allanngortinneqarnissaat Pinngortitaleriffimmit ilimagineqanngilaq, paasissutissanik nutaanik peqartoqanngimmat.

Apeqquut 2-mut akissuteqaat:

Tunumi qilalukkanik qaqqortanik pisassiisoqarsimanngilaq, Naalakkersuisullu uumassusilerisunit siunnersuinerimik tigusaqartoqartinnagu pisassiinissamik pilersaaruteqanngillat.

Tunumi qilalugaqatigiinnut marluusunut uumassusilerisut siunnersuinerat kingusinnerpaaq 2012-imeersoq tunngavigalugu pisassiisoqarpoq, siunnersuineq NAMMCO-mit aamma JCNB-mit ataatsimoortumik ilisimatuusutsikkut suleqatigiissitamik suliarineqarpoq. Siunnersuinerimik nutaamik tigusaqartoqartinnagu, taannalu tusarniaareernerup kingorna APNN-imit nalilersorneqarsimatinnagu qilalukkanut qernertanut uumasooqatigiinnut marluusunut pisassiissutit allanngortinnissaannik Naalakkersuisut pilersaaruteqanngillat.

Ilisimatitsissutitut nalunaarutigineqassaaq Tasiilap aqutsiveqarfiani 2014-imut qilalukkanut qernertanut pisassiissutit tamakkerneqarmata, Ittoqqortoormiini 2014-imi qilalukkanut qernertanut pisassiissutaasut 29-t pisarineqaratik sinnerummata. Taakku 29-t Tasiilap aqutsiveqarfianut nuunneqarsinnaanngillat, Ittoqqortoormiini qilalukkat qernertat uumasooqatigiit sananeqaatimikkut Tunumiittut sinnerinut naleqqiullugit allaanerummata.

Inussiarnersumik inuulluaqqusillunga

Karl-Kristian Kruse